

寶靜大師講述

佛遺教經講義

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

# 佛遺教經科判

## 初總題

## 次別文

### 序分

### 正宗分

### 流通分

初明共世間法要

初對治邪業法要

二對治止苦法要

三對治滅煩惱法要

初無求功德

二知足功德

三遠離功德

四不疲倦功德

五不忘念功德

六禪定功德

七智慧功德

八畢竟功德

初明根本清淨戒

二明方便遠離清淨戒

三明戒能生諸功德

四說勸修戒利益

初根放逸苦對治

二多食苦對治

三懈怠睡眠苦對治

初瞋恚煩惱對治

二貢高煩惱對治

三諂曲煩惱對治

初根放逸苦對治

二欲放逸苦對治

初勸修流通

二證決流通

三斷疑流通

四囑付流通

初顯示餘疑

二為斷彼之疑

三為重說有為無常相勸修



# 佛遺教經講義

寶靜法師講述  
學者鏡空記錄

在上海世界  
佛敎居士界

## 佛遺教經

佛遺教經四字。是一經之總題。此經是佛臨涅槃最後之教誡。句句懇切。字字血淚。凡爲佛弟子者。皆當依此遺教奉行。如父母之遺命遺囑。爲子弟者。應當遵守遺訓。此經似屬小乘。實爲大乘。何以故。天親菩薩云。爲彼諸菩薩。令知方便道。以知彼道故。佛法得久住。滅除凡聖過。成就自他利。故曰。此經妙旨。菩薩方能窮盡其致。文中寓意。須寡尤寡悔。二乘由是功成。卽事卽心。三賢於此果圓。是爲摩訶衍方便道。得以尋本歸源。此總題有通有別。能所並舉也。上佛遺教三字。是別名。經字是通名。別名別異。他經之名。通名。通於諸經之經。茲先講別名。佛遺教三字。佛爲能說之人。遺教爲所說之法。以人法立題。能所齊彰。如七種立題中。單三複三具足一。

此經卽爲複三之一。故云人法立題。佛者具云佛陀。此云覺者。自覺覺他。覺行圓滿之謂也。佛覺而不迷。衆生迷而不覺。不迷卽朗然大覺。無明夢醒。識得一切法。無非虛妄。了知依他如幻。偏計本空。則法法無非圓成實。悟性眞常。謂之佛。衆生不覺。如在大夢。卽我等在法會大衆。雖是聽經。亦何嘗不在夢中。何以故。認有身心世界。執幻妄爲實有。迷本覺爲妄覺。閉妙明爲無明。事事物物。皆妄知妄覺。所以成爲衆生。而眞覺性。始終未曾遺失。佛自覺。異凡夫。覺他。異二乘。覺圓。異菩薩。隨機設化。三覺圓。萬德備。故稱之爲佛。夫六凡覺一切法以爲實有。卽迷眞覺而爲妄覺也。二乘覺空。亦是妄覺。權乘菩薩覺二邊。內修觀行。外起化他。滯於二邊。亦爲妄覺。惟佛離二邊。絕中道。可謂眞究竟覺。妄覺有二。見思塵沙無明。九界衆生。雖在妄覺。當知卽妄全眞。如卽波處是水。如離妄求真。則如離波求水。衆生佛性。譬如地裏有寶藏。衣內有明珠。雖不得受用。而未遺失。此是理卽

佛如在夢之心。心不可滅。謂之本覺。若識波卽水。妄本真覺。卽名字卽佛。如夢初醒。知夢本空。謂之始覺。然修德有功。性德方顯。從性起修。全修顯性。了知見與見緣。并所想相。如虛空花。本無所有。又知此見及緣。元是菩提妙淨明體。念念照常。從名字始覺。而起觀行始覺。念念照本覺常理。心心息諸幻塵。卽名觀行卽佛。如是功深。妄覺漸落。所有迷理起分別之見。惑妄覺。及對境起憎愛之思。惑妄覺。以念佛參禪。誦經之觀行。而銷鎔之。如陽氣之融冰爲水。雖未全融。而已銷其堅相。此名相似卽佛。果能將根本無明之妄覺。分分破。真覺法身分分證。卽可分身百界作佛。而無明未盡。卽名謂分證卽佛。若能五住究竟。二死永亡。徹法底源。始本不二。性修一如。如夢既全醒。唯一覺心。更無二心。是爲究竟覺。所謂從來全真覺。而爲妄覺。今日全妄覺。而爲真覺。卽名爲究竟卽佛。今題初佛字。卽指究竟卽佛之釋迦牟尼佛。卽爲能說之人。遺教是佛所說之法。佛滅度後。凡佛

所說五時八教。三藏十二部經。皆是遺教。佛以衆生在夢而不醒。故佛遺  
留言教。若洪鐘而警覺之。六凡在見思夢中。有同居土之妄境。故佛遺留  
權實教法之警鐘。警醒在夢之九界羣迷。佛本不生。非生而現生。佛本不  
滅。非滅而現滅。法華經云。諸法從本來。常自寂滅相。佛早證寂滅。而爲衆  
生故。示現生滅。所謂緣盡則滅。緣至則生。梵網經云。我佛來此娑婆世界。  
坐大寶華王座。八千返。法華經云。我成佛以來。甚大久遠。爲衆生機故。於  
無生無滅中。示生示滅。佛實常住。未嘗滅度。如月輪在天。水清則影現。水  
濁則影亡。智者大師。讀法華經。至藥王菩薩本事品。是真精進。是真精進。是名眞法  
供養。忽然入定。親見靈山一會。儼然未散。以此可知佛常住世。不生不滅。  
又佛以大悲無邊。拔濟未來。於示現滅度時。特說此遺教。假使不遵守遺  
教奉行。卽是忤逆不孝。非法王弟子。經字。梵語修多羅。此云契經。上契十  
方諸佛之妙理。下契一切衆生之機宜。又云。貫穿義。便遺留之言教而不



零落。二攝持義。持此法而攝化衆生。依此方有四義訓經字。經者常也。此佛遺留教法。亘古亘今。天魔外道不能摧壞。經者法也。此遺教卽爲修行之法則。了生死。成佛道之法門。經者典也。爲昏暗之明燈。迷途之指南。爲化導衆生之定典。經者徑也。爲正修行光明之道路也。若修行不得正路。如以盲引衆盲。相牽落火坑。此遺教經。扶戒以詮定慧。是返妄還真覺之道路也。三藏十二部。是廣相遺教。此遺教經。是略相遺教。文字雖少。而詮大藏之妙。如本林圖書館之成立。所羅列之經典。皆爲佛之遺教經。當此末法時代。修行易。最捷徑。最穩當。唯念佛最好。此法門亦是我佛親口宣揚之遺教。爲佛弟子者。當依教行之。憶佛念佛。現前當來決定見佛。可直歸本有之真覺。方不負我佛之遺教也。

亦名佛垂般涅槃略說教誡經。

此經亦名佛垂般涅槃略說教誡經。亦是人法立名。佛垂般涅槃。卽釋迦

牟尼佛將入未入涅槃之際。謂之垂入。垂亦臨也。涅槃具云。般涅槃那。此云滅度。滅五住煩惱。度二種生死。亦曰圓寂。亦曰涅槃。不生。涅槃名不滅。衆生在生死苦海。佛居無上涅槃寂滅性中。涅槃二字。非死後方稱爲涅槃。卽吾人現前一念介爾之心。本不生。亦不滅。清淨本然。周徧法界。卽是涅槃。但衆生於無生滅中。妄見生滅。隨妄流動。是皆昧自性清淨。不生不滅之涅槃妙心故耳。佛以生滅中。澈見不生滅性。早證涅槃果德。然爲衆生而起大悲曠濟。故於非生非滅中。隨機感應。示生示滅。而今復現般涅槃相。然涅槃有四（一）自心清淨涅槃。人人本具。個個不無。凡聖平等。生佛一體。無欠無餘。不遷不變。在衆生分上。雖則全涅槃變爲生死。而生死流轉中。原是不生滅之眞常。是爲理卽之涅槃。在諸佛分上。全生死而成涅槃。而不生滅性本具。現生現滅之妙用。是爲究竟卽之涅槃。唯衆生是性德本具。名在纏涅槃。諸佛是修德究竟。是出纏涅槃。故此諸佛現生現滅。

無非是妙用。衆生緣生緣滅。無非是妄動。夫諸法從本來。常是寂滅相。法無非不生滅。法法無非涅槃相。然今見內而身心。生住異滅。外而世界。成住壞空。形形色色。無非生滅者。是皆一翳在目。空花亂墜。一妄在心。恆沙生滅。病目見空華。妄見生滅耳。如醉見屋動。屋實不動。舟行岸移。岸本不移。法華經云。是法住法位。世間相常住。若法不住法位。卽妄見有生滅。遷流矣。楞嚴經云。因緣和合。虛妄有生。因緣別離。虛妄有滅。性眞常中。求於去來。迷悟生死。了不可得。故知由緣而生。生卽非生。生無所從來。因緣而滅。滅卽非滅。滅無所去處。衆生之生來死去。當體原是不生滅之涅槃。此則卽是自性清淨涅槃。此涅槃生佛平等。不論出入。(一)有餘涅槃。三乘聖人。見思煩惱之子。縛雖斷。而身心之果縛猶存。既果縛之身心尙在。故仍有饑渴寒熱病苦。如藏教果頭佛亦如是。初證道果。卽證入此涅槃。但尙有果縛在。故名有餘涅槃。此約證論入。(二)無餘涅槃。三乘灰身泯

智復歸無名無得之本體。此則子縛既斷。果縛之身心亦亡。如藏佛八十歲老比丘。中夜入滅。故名無餘涅槃。今說遺教之佛。卽爲有緣度盡。故示垂入無餘涅槃。故今正約此而論入也。(四)無住涅槃。二邊不住。中道不安。有智慧故。不住生死。有慈悲故。不住涅槃。不住生死。故能非滅示滅。不住涅槃。故能非生示生。是謂無住涅槃。我佛塵點刼前。久已成佛。早已澈證無住涅槃。爲慈悲度生。數數唱生唱滅。今次八相成道。最後所應度者。皆已度訖。故垂入無餘。而略說教誡。爲最後之警策。然非同二乘之一滅永滅也。又有三種涅槃。(一)性淨涅槃。無動無搖。無出無入。湛然常住。卽法身體。(二)圓淨涅槃。煩惱斷盡。契合真性。一入永入。卽般若相。(三)方便淨涅槃。示生示滅。應機施化。垂手入纏。方便示現。唱生唱滅。卽解脫用。若以此三義。而支配前四涅槃者。性淨卽自性清淨涅槃。亦卽無住涅槃之體。圓淨卽無住涅槃之相。方便淨卽無住涅槃之用。其有餘無餘二種。

涅槃。在二乘分上。則攝屬圓淨。然僅圓淨之少分。但顯偏真。未明俗中二諦。但淨見思分段。未淨根本無明。及變易生死。若在如來分中。則攝屬方便淨。初成道時。示同二乘之有餘。今垂滅度。示同二乘之無餘。略說教誡者。佛住世。一期設化。說法四十九年。談經三百餘會。以衆生心病有千差萬別。所以佛設教網。撈籠衆生。有無量無邊之法門。五時八教。三藏十二部之教門。此皆謂之廣說教誡。今將垂滅時。促故略示教誡。爲大悲心切。憐愍未來衆生。總其要而說之。故稱最後遺教。此法題講釋已竟。

### 姚秦天竺沙門鳩摩羅什譯

此是譯經人題。梵語鳩摩羅什。此云童壽。謂童年而有耆德也。師祖居印度。世爲王臣。父棄官而遊學。至龜茲。國王久聞賢名。以女妻之。而生什。師居胎日。母增智辯。七歲出家。九歲辯拙邪外。初苻堅爲秦王。有德星示現。太史奏曰。當有智人入輔中國。堅曰。朕聞西域有羅什。襄陽有道安。隨遣

將軍呂光率兵七萬爲請羅什西征龜茲。光雖破龜茲得師而返。途次聞姚萇殺堅自據西涼。至姚興稱王。呂光死。呂隆復位。姚興亦信仰師。乃滅涼迎師入長安。時在姚秦弘始四年。東晉安帝隆安元年中也。此經卽爲什師所譯。什師爲七佛譯經之師。故所譯者深契佛旨。巧合羣機。沙門者勤修戒定慧。息滅貪嗔癡也。又息心達本源。故號爲沙門。譯者翻也。易梵文而成華言。故名譯也。此是譯主概况。至此人題已竟。

講釋總題已竟次釋別文

初分三大科。一序分。二正宗分。三流通分。序分如人之頭首。五官具足。正宗分如人之身段。五臟具足。流通分如人之手足。能執捉運奔。此三分之科判。始於道安。證於親光。由是彌天高判。古今同遵。序者敘也。敘一經之緣起。序中有通有別。通於諸經。曰通序。局於本經。曰別序。正宗分。正爲本經中所說宗要也。流通分。卽將本經之利益功德。源源流通。使不滯攔也。

經初釋迦牟尼佛。乃至略說法要。是爲序分。然諸經之經初。皆有如是我聞。一時佛在某處等。六種成就之通序。今遺教經初。並未見如是我聞等者。須知此經首段。卽是當經別序之發起意。而亦具六種成就。何以故。釋迦牟尼佛。卽是教主成就。是時中夜。卽時成就。於娑羅雙樹間。卽處成就。爲諸弟子。卽聞成就。亦卽衆成就。略說法要。卽法成就。且諸經俱云如是我聞者。爲斷三疑故。今經首句稱釋迦牟尼佛。亦具足斷三疑之意故。(一)言釋迦。則非他方佛來。(二)言釋迦。則非阿難成佛。(三)言釋迦。則非佛自稱。卽知非佛重起也。三疑具斷。與如是我聞等無異。蓋變格而合常者也。

### 釋迦牟尼佛。

釋迦。此云能仁。佛之姓也。其姓尊貴。卽別相也。牟尼。此云寂默。佛之名也。以自體清淨。卽總相也。能仁約事爲別。寂默約理爲總。佛該總別而事理

融通名之大覺佛。能仁是照用。則具大慈悲。不住偏空無爲。拔衆生生死之苦。與衆生究竟之樂。非如二乘。沈空滯寂。墮無爲坑也。寂默是寂體。則具大智慧。不住偏假頑有了。達生滅中卽不生滅性。幻妄相中卽妙覺明體。不同凡夫執有着我。隨生死流也。又能仁故。實行空花佛事。晏坐水月道場。非如二乘以化城爲寶所。又寂默故。言語道斷。心行處滅。復本心源。究竟清淨。非如六凡迷幻妄爲實有。吾等衆生在寂默中。不能寂默。念念遷流。心心不住。以無生中。妄起生滅。身不能寂默。則起殺盜淫之妄動。口不能寂默。則起口四之妄說。心不能寂默。則起貪嗔癡之妄毒。所以法身流入五道生死海中。皆是不肯寂默。不肯放下緣故。果能三業寂默。生滅旣滅。寂默現前。忽然超越世出世間。旣證究竟寂默。牟尼之體。當然亦同釋迦能仁起他之用。示生示滅。普度羣迷矣。以牟尼故。非生非滅。以釋迦故。現生現滅。體用一如。悲智雙運。真空不空。卽消極而積極。救世能仁之



慈悲也。妙有非有。卽積極而消極出世。寂默之智慧也。釋迦大悲。卽大俗諦理。牟尼大智。卽大真諦理。佛卽中道第一義諦理也。吾人之自心中。靈不昧。了了常知。卽是釋迦。湛然常寂。了不可得。卽是牟尼。釋迦卽假觀。牟尼卽空觀。佛卽空假不二之中觀。釋迦卽一境三諦。牟尼卽一心三觀。境觀不二。能所一如。卽本源自性之釋迦。牟尼佛。朗然獨耀矣。然釋迦牟尼佛。早已成佛。甚大久遠。今示八相成道。爲應機故耳。

### 初轉法輪度阿若憍陳如

釋迦世尊。示生天竺。淨飯爲父。摩耶爲母。爲悉達太子。十九覩老病死。而現出家相。入雪山六年苦行。日食一麻一麥。後於菩提樹下。夜覩明星。成等正覺。慧眼觀機。轉輪度生。昔在雪山。侍奉五人。現在鹿野苑中。於佛有功。當先得度。於是不動道場。而遊鹿苑。雙垂兩相。二施同時。三轉法輪。度五比丘。轉法輪者。佛說法也。卽佛自證入正等正覺之法。轉運入衆生心。

中同登彼岸。輪有二義。(一)輾轉義。(二)摧碾義。佛所悟之四諦法。度入衆生之心。名之爲輾轉義。此法能摧滅衆生惑業苦三障。名之爲摧碾義。三轉法輪者。卽示勸證三也。佛於鹿野苑中。對五比丘。說苦集滅道之四諦法。(一)示轉。此是苦。三界依正果報色心。三苦八苦。無量諸苦。逼迫性也。此是集。貪瞋癡等分。四心流動。惑業因緣。招感性也。此是滅。生滅滅已。寂滅爲樂。可證性也。此是道。戒定智慧。明生暗滅。可修性也。(二)勸轉。此是苦。汝當知。此是集。汝當斷。此是滅。汝當證。此是道。汝當修。(三)證轉。此是苦。我已知。此是集。我已斷。此是滅。我已證。此是道。我已修。四諦有四。謂生滅。無生。無量。無作等四諦。今爲五比丘所轉者。爲生滅四諦法輪。所謂三轉法輪於大千。三寶於是現世間。阿若憍陳如。阿若尊者名。此翻解。從最初得解而立名也。亦翻無知。以根智證見諦理。不存能所故也。憍陳如。此翻火器。尊者姓也。憍陳如等五人。一類轉。二跋提。三拘利。此三人爲佛。

父族人也。四憍陳如。五十力迦葉。此二人爲佛母族人也。此五人以陳如最初得解故。但指陳如以該餘也。

### 最後說法。度須跋陀羅。

最後說法。卽是佛在雙林樹間。將垂滅度。說此遺教經。爲最後所說之法。度須跋陀羅。度者。渡也。渡生死海。而到涅槃彼岸也。須跋陀羅。此云好賢。或云善賢。雖能修持。而心外取法。是爲外道。曾得非想非非想定。在鳩尸那城。年一百二十歲。佛將涅槃。大悲心切。哀愍其盲修故。敕阿難召之。謂佛如優曇華現。今中夜滅度。當往求教。否則後悔莫及。時須跋陀羅聞言從之。隨至佛所。得聞聖教。卽證道果。阿難五百世中。爲須跋陀羅之子。以其愛習未忘故。佛敕阿難往召。卽應召而來。得證善果。所應度者。皆已度訖。

佛在世時。說法四十九年。一代設化。以五時八教。收攝無餘。初坐道場。現

盧舍那身。與四十一位法身大士。說華嚴圓頓大教。二乘在座。如聾若啞。於是雙垂大小二相。同施頓漸二教。說華嚴而復說阿含小教。小機見者。卽佛初成道。度五比丘。轉生滅法輪也。但小乘初證道果。卽坐守化城。不肯前進。故又說方等。四教並談。彈偏斥小。歎大褒圓。令其恥小慕大。然雖欲回小向大。而執情未忘。所以又說般若。以智慧水。蕩滌執情。到法華會上。三乘同歸一乘。九界共成佛界。開權顯實。舉手低頭。皆成佛道。而尙有五千退席漏網之機。所以有最後之極談。說涅槃經。扶律談常。追說追泯。世尊一期化緣。始於道場鹿苑。終至鶴林雙樹。於其中間。所度衆生。無量無邊。所謂種在久遠。熟於過去者。無不脫於今時。所應度者。皆已度訖。正明佛智鑒機。恆無忘失。得益之衆。豈算數所能窮盡也哉。

於娑羅雙樹間。將入涅槃。

娑羅雙樹。佛入涅槃處。亦云鶴林。佛入滅時。雙樹變白。如白鶴色。故名鶴

林娑羅。此云堅固。此樹四方各有二株。共成八樹。各方一枯一榮。故云雙樹。上枝結合。如傘之蓋。下根相連。如牆之圍。佛於四枯四榮之雙樹間。表佛入非枯非榮之中道。非榮示破凡夫之榮。四倒非枯。示破二乘之苦。四倒。凡夫榮四倒者。一常顛倒。於依正二報。萬事萬物。一切皆是幻化無常。生滅遷流之法。而妄執爲常住。非常而計常也。二樂顛倒。於人間有老病死苦。天上有五衰相現。三界無安。猶如火宅。衆苦充滿。斯有何樂。而衆生將苦作樂。而起樂倒。三我顛倒。四大本空。五蘊非有。生時空手而來。死時空手而去。於無我法中。妄計爲我。捨八自在之我。而妄計我見也。四淨顛倒。此身種子不淨。相性不淨。根本究竟不淨。於世間一切自他身心不淨之法。而妄起淨見。非淨計淨也。此爲凡夫之榮。四倒皆從執有而起倒也。二乘之枯。四倒者。一常計無常倒。法法本不生滅。法法原是常任。於寂滅真常中。而妄計爲無常也。是卽飲三昧酒。墮無爲坑。執藥

成病之故耳。(一)樂計爲苦倒。一切法皆有安樂性。無分斷變易之苦。而有解脫自在之樂。但二乘視三界如牢獄。畏生死如冤家。於無上菩提涅槃之覺法寂靜樂。而妄計爲苦也。(二)我計無我倒。本有八大自在之真我。而妄計無我。如同北俱盧洲之冰執無我。所以韋陀不應於豎窮橫遍自在真我中。而妄執無我。墮於偏空也。(四)淨計不淨倒。法法本自清淨。從來不與煩惱染法相應。於究竟清淨體中。而起不淨。此爲二乘之枯四倒。皆有著空而起倒也。佛在雙樹間。而示入涅槃。正顯非枯非榮。而卽苦卽榮。非常非無常。而雙照常無常。非樂非無樂。而雙照樂無樂。非我非無我。而雙照我無我。非淨非不淨。而雙照淨非淨。非空非有。而卽空卽有。雙遮二邊。而雙照二邊。空言不二。遮照同時。大乘人見八樹。卽表大般涅槃。小乘人見二樹。表非斷非常。卽偏空涅槃也。

是時中夜。寂然無聲。爲諸弟子。略說法要。

佛之化緣已畢。將入涅槃。中夜表示中道。是時中夜。寂然無聲者。外而世界寂然無聲。內而身心寂然不動。又佛在中夜。示般涅槃相。時諸弟子等。哀戀愁容。悽惻慘淡。寂然無言之際。然佛是時。雖寂然無聲。而悲心廣大。不忍恻然。哀憐衆生。復於無言無聲中。而略示法要。爲諸弟子開示最後警策。諸者衆也。學在師後爲弟。從佛得解爲子。所謂從佛口生。從法化生。今爲衆弟子囑付。略說身後之法要。我在世時。以我佛爲師。我滅度後。以戒爲師。諸子諦聽。當勤精進。荷佛家業。紹隆法化。是時中夜。寂然無聲。此二句。正示牟尼之寂默。無說無示。所以佛說法四十九年。未曾說着一字。如維摩大士默然。杜口於毗耶。爲諸弟子略說法要。此二句。正顯釋迦之能仁。無說而說。說此遺留之聖教。無言而言。言此法門之要道。作教網之總綱。爲末後之垂範。此經誠是我佛之叮嚀付囑。一字一血者也。上釋序分竟。

二正宗分。二初明共世間法要。二明不共世間法要。初中分三。初對治邪業法要。二對治止苦法要。三對治滅煩惱法要。初又分四。初明根本清淨戒。次明方便遠離清淨戒。三明戒能生諸功德。四說勸修戒利益。今初明根本清淨戒。

汝等比丘。於我滅後。當尊重珍敬波羅提木叉。如闇遇明。貧人得寶。當知此則是汝等大師。若我住世。無異此也。

此以下是正宗分之文。大科有二。明共不共世間法要。此法要滅除凡聖過。成就自他利。佛見衆生惑業苦之三障。如惡義聚。當以法要而對治之。故召告汝等比丘。諦聽。諸弟子中。獨呼比丘者。以比丘爲四衆之首。舉其首。以該四衆及在會人等。如金剛經佛告須菩提。彌陀經佛告舍利弗。告一人而該大衆。舉一衆而該餘衆。又有三寓義。一者。示遠離相故。二者。示摩訶衍方便道故。同二乘故。三者。比丘爲四衆之首故。比丘。此云除。僅。卽



福田之稱也。又多含不翻。含三義故。一乞士。二破惡。三怖魔。乞士外乞食以資色身。內乞法以活慧命。乞食之法。多行之於印度。不但出家。稱爲乞士。卽在家修道人。亦可乞食辦道。故亦得名爲乞士。人之初生。空手而來。乞賴父母而爲生活。至年壯時。乞職業以營生活。所以白衣人。亦可稱爲乞士。若約乞法。則在家出家佛弟子。皆須乞求法要。以資修持。更可名爲乞士矣。破惡。凡四衆弟子。能破除身三口四意三之惡者。皆可名破惡怖魔。凡四衆弟子。能依佛聖教。得正修行。真實用工。觀力功深。能令魔宮震動。魔生恐怖。是知四衆弟子。能具此三義者。皆可名爲比丘矣。汝等比丘。於我滅後。此二句。正示現遺教之相。言我入滅之後。汝等依何法修持。得達正覺。無他。應當尊重珍敬波羅提木叉。波羅提木叉。此云保解脫。亦翻別別解脫。亦云處處解脫。此卽是不盡滅法。汝等依戒修持。我佛保證。定得解脫。萬丈高樓從地起。戒如地基。爲菩提之本也。比丘二百五十戒。

比丘尼三百五十戒。或沙彌之十戒。優婆塞夷之五戒。戒如浮囊。能渡生死苦海。到涅槃彼岸。如闇遇明。貧人得寶。此二句約喻顯戒。宜如何恭敬。尊重而珍守之。勿得疏忽而荒背之。戒如大明燈。能消長夜暗。戒如摩尼珠。兩物濟貧窮。若不持戒修行。生如行肉走尸。死如草木同枯。生不知來處。死不知去處。糊塗昏暗。醉生夢死。雖在光天化日之下。如在無明黑暗中。屋中能持淨戒。則心地清淨。寂極光通。故得戒何異如暗遇明。若不持戒修持。雖是大富貴。卽是窮貧之徒。皆是孤露之窮子。不知持戒。則不知佛法。不知修行。故無禪定。衣無智慧。食無功德。法財無涅槃舍。雖有身外之財物。而無功德之法寶。所以六凡在見思黑暗中。有分段生死。無無漏戒寶。二乘在塵沙黑暗中。有方便生死。無妙有戒寶。權乘菩薩在無明黑暗中。有變易生死。無圓中戒寶。果能精進戒行。如得摩尼寶珠。取之不盡。用之不竭。所以百千三昧。全在一念。恆沙妙用。不離方寸矣。大師者。羣生之

模範也。能化導無量衆生。令知寂滅。故名大師。佛爲三界導師。四生慈父。謂之大導師。當知我滅度後。戒是汝等大師。汝等能持戒。雖末世卽是正法。卽常近佛。所謂百世何異同時。若我住世。無異此也。若不能持戒。則同堂猶隔萬里。金口誠言。若斯宜諦審之。

### 次明方便遠離清淨戒

持淨戒者。不得販賣貿易。安置田宅。畜養人民。奴婢畜生。一切種植。及諸財寶。皆當遠離。如避火坑。不得斬伐草木。墾土掘地。合和湯藥。占相吉凶。仰觀星宿。推步盈虛。歷數算計。皆所不應。

此段文。明方便遠離清淨戒。如何是方便。卽指販賣貿易等戒。此舉恆情最易犯之戒。若能遠離嚴禁清淨。則諸根本戒。自然清淨。旣令戒身清淨。堪紹如來清淨法身。持此方便戒相。卽是根本戒之外護。初十一事。爲方便遠離增長。凡夫之過咎。爲佛弟子。持守清淨戒者。不得販賣貿易。不得

安置田宅。不得畜養人民奴婢畜生。不得種植一切。不得蓄諸財寶。不得斬伐草木。不得墾土掘地。(一)不得販買他人之賤物。以昂價出售與人。是增現前求利過。(二)不得賣。出貨曰賣。以物易錢。是增方便求利過。(三)不得貿易。即彼此交換財物。是交易求利增過。若依世價。無求利心。不犯。(四)不得安置田宅。即安置良田。多多益善。建設華宅。重重樓閣。圖安隱自在。飽食終日。是所居業處。求多安隱增過。(五)不得畜養人民。增外眷屬。非同意者。起造惡業。是增眷屬過。(六)不得畜養奴婢。男僕謂之奴。女役謂之婢。用之則卑心難生。我慢心易長。是增我慢過。(七)不得畜養畜生。或貪肥口腹。或求增厚利。或故養戲弄。是增養生求利等過。(八)不得栽種一切植物。是增多事多擾心過。(九)不得蓄諸財寶。即積聚寶庫。慳貪不捨。作守財奴。是增積聚過。(十)若不知如火坑。不知遠離。是增不覺過。(十一)不得斬伐草木。墾土掘地。此等令失威儀。侵損蠢動含靈。

之依報。損害土中微細之生命。失諸慈悲。是增不順威儀。及損衆生過。上來十一事。凡在家出家佛弟子。持淨戒者。皆當遠離。如避火坑。自應戰戰兢兢。守持無犯。如臨深淵。如履薄冰。雖然如是。在家白衣。未學佛者。不在此例。又若在家出家佛弟子。發菩提心。行菩薩道。慈悲利物。爲他損己者。不妨開之。爲利益衆生故。而販賣貿易。作諸慈善事業。益物利人。爲供養三寶故。而安置田宅。爲鰥寡孤獨故。而畜養人民。爲憐愍化導故。而攝受奴婢。爲慈悲放生故。而收買畜生。爲供給衆人故。而發心種植一切。爲檀施貧窮困苦。去慳貪不捨習故。而傾諸財寶。如龐居士。盡家財寶。傾之於海。淡泊身心。安貧守道。爲建設僧坊塔寺故。而斬伐草木。爲有益利物事。故而墾土掘地。能如是何所不得。自古高僧。有買莊田者。有畜夫力者。有耕田鋤地者。有牧牛養畜者。諸如此類。皆大士所作。超出尋常。非律所拘。不可以此議彼。若末世初心。唯宜遵護。免同凡夫增過。次五事。遮異見故。

方便遠離外道損智增過。凡爲佛弟子持淨戒者。不應合和湯藥。不應占相吉凶。不應仰觀星宿。不應推步盈虛。不應歷數算計。此五遮戒。皆不應犯。當防護之。免同外道邪見。而損正智。故合和湯藥者。以邪心求利。故邪心有二。一不知天命。妄冀延年。二殺生充樂。利人害物。皆名邪心。以之求利。爲罪彌大。若學五明以濟於物。如華嚴中學醫方明。謂五地菩薩。善于調藥。療治衆生病。又如藥王藥上者。烏乎不可。占相吉凶者。看相算命。占卦卜筮。矯言惑人。知過去未來之吉凶禍福。邪心求利。卽四邪命中之方口食。若依華嚴學工巧明。謂占相工業。由前世善惡爲因。感此吉凶之報。仰觀星宿者。仰觀天道星宿。宿音秀。謂五星二十八宿等。觀天文風雨。星宿晦明。知人間災祥安危。此卽仰口食。推步盈虛者。步亦推也。推算步量天地之盈滿虛隙。得時令臧否之消息。歷數算計者。歷數列次也。孔穎達正義。謂算日月行道所歷。計氣朔早晚之數。所以爲一歲之歷。上二亦邪。

命者也。其爲沙門者。志求解脫。當制心一處。豈得攻乎異端。濫同外道。減損正智者乎。若如藥王藥上菩薩之智慧湯藥。治衆生身心二病。爲大法王之普施法雨。阿伽陀藥。萬病總持。如正徧知。占九界衆生之生住異滅。善惡爲因。吉凶爲報。初相爲本。後相爲末。而究竟等。爲明行足。觀察世間之成住壞空。盈虛消息。算數循歷。澈照河沙。了無罣礙。現前松直棘曲。皆了原由。恆沙界外一滴之雨。能知分齊頭數。佛弟子能具如是智。發如是用。則無往而不可。可盡量之。否則若末世初心。當遮止之。爲佛弟子持淨戒者。當善思之。

節身時食。清淨自活。不得參預世事。通致使命。咒術仙藥。結好貴人。親厚媿慢。皆不應作。當自端心。正念求度。不得包藏瑕疵。顯異惑衆。於四供養。知量知足。趣得供事。不應畜積。

此段文有三義。行身口意三處之波羅提木叉。節身時食。乃至通致使命。

此四句。是持身處戒。咒術仙藥。結好貴人。親厚媒慢。此三句。持口處戒。當自端心。乃至不應畜積。此六句。是持意處戒。初持身處。木叉有五。(一)節身。對治他求放逸障。爲佛弟子。當節操自身。不可輕浮妄動。清淨無爲。皎然獨立。以蓮華出生於汙泥。而不爲汙泥之所染。富貴不能動其心。威武不能曲其志。自尊自重。嚴束品格。貞節其身。曾子有三省之誠。顏子有六禮之訓。在家君子。尙重節身。况學佛出世丈夫。更當約束自身。若不節身。則殺盜婬之惡易犯故。(二)時食。對治內資無厭足障。時食者。時至而食。不得非時食。夫食時有三。早爲諸天食時。午爲諸佛食時。夕爲鬼神食時。爲佛弟子。本是樹下一宿。日中一食。若非時而食。卽違背佛制。所謂三心未了。水難消。施主一粒米。大如須彌山。假饒不了道。披毛戴角還。能過午不食。既爲憐愍餓鬼。又復隨順佛制。爲最好。惟此土色身弱。開方便門。日食三餐。四餐者有之。藉食以辦道。食以填飢瘡。當以慚愧心。作藥石觀。而



受食。若規定之三餐外。或爲食故。強事趨馳。或安坐房中。私營別味。非時而食。飽食終日。無所事事。醉生夢死。一生空過。道業未成。泥犁先就。是誠深可太息者也。(二)清淨自活。對治共相追求障。爲佛弟子。當淡泊身心。清淨自居。謂之正命。或住山岩石窟。水邊林下。不事王侯。高尚其志。無求無欲。清高自守。所謂一鉢千家飯。孤身萬里遊。又云天下叢林飯似山。鉢孟到處任君餐。爲佛弟子。若不能清淨如法而自生活。則墮入於四種邪命。(一)下口食。謂種植田園。和合湯藥。(二)仰口食。謂仰觀星宿。日月風雨。(三)方口食。謂曲媚豪勢。通使四方。(四)維口食。謂學種種咒術。卜算吉凶。凡在家出家佛弟子。皆當清淨自活。廉潔立身。(五)不得參預世事。是自性止多事。既爲比丘。剃髮染衣。已示遠離之相。不得與世俗酬應。世相無常。塵勞煩惱。一切諸事。皆是水月空華。凡爲在家出家弟子。當珍惜光陰。一寸時光。卽一寸命光。精進不已。何得有暇參預世事。(六)不得通

致使命。是自性尊重。不作輕賤事。爲佛弟子。不應爲國王貴人。通致使命。傳達消息。輕賤自己人格。而爲人走使。被人差遣。萬不可也。爲父母師長者。應有服從使命之義。命行則行。無犯上五事。皆爲持身處戒。次釋持口處戒有二。(一)咒術仙藥。卽爲邪法話。凡爲佛弟子。不應學外道咒術仙藥。咒術卽依邪術。惱亂衆生語。仙藥卽依邪藥。作世不正語。(二)結好貴人。親厚媠慢。此爲邪人語。與富貴人結交要好。卽爲攀緣。專謀結交豪貴大名之人。阿諛逢迎。自輕自賤。爲佛弟子。當深戒之。如荆溪法智大師等。雖帝皇寵召而不應。清高自居。無爲無求。遠離避嫌故。親厚媠慢者。凡親厚富貴人。必多作鄙媠之語。對下又多作我慢之語。此二是邪人邪法語。皆所不應。卽爲持口戒。爲佛弟子。皆不應犯。免墮四種邪命故。次持意處戒有六。(一)當自端心。對治多見他過障。見他過則不能自淨其心。當端身正心。二六時中。精進觀行。自掃門前雪。不理他家瓦上霜。所謂不於其

中起分別。是故此處最吉祥。(一)正念求度。對治邪思維障。正念者。無念也。卽離念也。遠離一切妄想思維。無有染汙分別之妄念。卽清淨正念。唯以清淨正念。度自性之衆生。得人身如爪上土。失人身如大地土。此身不向今生度。更向何生度。此身抖擻精神。精進正念。除却生死大事外。其餘都是可商量。時至末劫。最好依佛得度。佛說末法億億人修行。罕難得道。唯以念佛得度。此念佛法門。十方諸佛之所共讚。九界衆生之所同歸。所謂淨念相繼。不度而度。(二)不得包藏瑕疪。不污淨戒。不受持心垢。故瑕疪。白玉之黑點也。卽喻犯戒之痕跡。亦卽過罪也。人非聖賢。誰能無過。過而能改。善莫大矣。爲佛弟子。三業不淨。有意無意之犯過。皆當於三寶前。求哀發露。至心懺悔。不得絲毫隱藏。包守瑕疪。(四)不得顯異惑衆。遠離無緣。顯己勝行。令他不正解。故爲佛弟子。不可標奇立異。惑亂衆生。須知平常心是道。若沽名釣譽。突現奇相。裝魔作樣。愚人惑衆。自欺欺人。不重

實際者卽屬邪命邪見人也。持淨戒者當以爲鑑。(五)於四供養。知量知足。對治於受用衆具中。無限無厭足障。四供養者。謂飲食衣服臥具湯藥也。若佛弟子爲辦道故。受檀越供養四事。然當知量知足。不能妄生多貪。多求無限無厭。要付量己德行。是否可受此供。有所受無論美惡多少。卽須知滿夠足。萬不可生多貪忘念。若入三昧分。則自知量。若入道分。則自知足。(六)趣得供事。不應蓄積。遠離貪覆貯積衆具故。正得受供事之際。爲佛弟子。當知節量。當知止足。不求豐厚。衣鉢之餘。分寸不蓄。有餘則轉施衆生。斷不可從事儲藏。免墮蓄積之過。以上爲護戒故。方便遠離凡夫增過。及外道損智。又明身口意三業。本無非要佛弟子。令戒身清淨。戒爲解脫之本。菩提之源。若能精進持戒。如護明珠。則戒淨心淨。堪紹如來清淨法身矣。

三 明戒能生諸功德

此則略說持戒之相。戒是正順解脫之本。故名波羅提木叉。因依此戒。得生諸禪定。及滅苦智慧。

初句此則二字。卽承上護戒。治凡外增過損智之戒相。及身口意之三木叉。此則略說輕戒。尙須嚴護之。何況根本大戒。甯可疎忽耶。戒體唯一。所謂無作。戒相至多。有五篇七聚。今舉恆常最易犯者言之。故名略說持戒之相。戒是正順解脫之本。戒是防非止惡爲義。防身口七支之惡。止意地三毒之非。成就三業解脫。有餘無餘。二種解脫。皆以戒爲其本。持戒則正順涅槃之流。違戒則隨順生死之流。解脫者。自在之義。不受三業三惑之拘縛。而得三德三解脫之自在。三解脫者。一空解脫。二無相解脫。三無作解脫。煩惱已盡。善惡不起。逆順一如。卽無餘解脫。子縛已斷。果縛未亡。卽有餘解脫。若欲真正隨順其二種解脫。非波羅提木叉不爲功。故名保解脫木叉。戒能防身口惡。定共戒。能伏心惑。道共戒。能斷心惑。修持之人。皆

因依賴此戒得生諸禪定。謂世間四禪八定。出世間觀練薰修三諦三昧等諸禪定。所謂尸羅不清淨。三昧不現前。若不持戒。縱有多智禪定。皆是魔業。猶如蒸沙作飯。經劫不成。戒爲滅衆苦之本。戒爲生智慧之源。智則照理。慧能了境。一切智滅六凡之執。有苦道種智滅二乘之著。空苦一切種智滅菩薩之滯。二邊苦。所謂無量清淨慧。皆從禪定生。因戒生定。因定發慧。定慧皆從戒生。皆以戒而爲基本也。

#### 四說勸修戒利益

是故比丘。當持淨戒。勿令毀缺。若人能持淨戒。是則能有善法。若無淨戒。諸善功德。皆不得生。是以當知戒爲第一安隱功德住處。

是中勸修有五。爲比丘者。當持清淨戒。卽第一勸其不失自體。勿令毀缺。是第二勸其不捨方便。持淨戒。能有善法。卽第三勸其三業常集功德。無戒不生諸功德。卽第四勸其知多過患。安隱功德住處。卽第五顯示菩薩

所修戒中。有如是得失。戒爲第一安隱處。我當住安隱處。不住不安隱處。此正示勸修利益義也。

二對治止苦法要三。初根欲放逸。二多食苦對治。三懈怠睡眠苦對治。初中二。初根放逸苦對治。二欲放逸苦對治。今初。

汝等比丘。已能住戒。當制五根。勿令放逸。入於五欲。譬如牧牛之人。執杖視之。不令縱逸。犯人苗稼。若縱五根。非唯五欲。將無涯畔。不可制也。亦如惡馬。不以轡制。將當牽人墮於坑陷。如被刼賊。苦止一世。五根賊禍。殃及累世。爲害甚重。不可不慎。是故智者。制而不隨。持之如賊。不令縱逸。假令縱之。皆亦不久見其磨滅。

此段明五根放逸之苦。以法對治。以喻顯之。此有三喻。初牧牛喻。二惡馬喻。三如被刼賊喻。正明護戒法要。汝等比丘。暨諸佛子等。既已能住戒。修持辦道。先當制伏五根。根者。生長爲義。能生諸識。吸引五欲塵勞。五根者。

卽眼耳鼻舌身也。五欲者。色聲香味觸也。五塵本非欲。其中別有一種可愛滋味。能令人生希須愛欲之心。故言五欲。世人常爲五欲之所惱亂。而猶追求不已。至死不捨。乃至爲此五欲。損身失命。遭無量苦。誠可太息。今勸修學行人。識透塵欲虛妄。勿令五根放逸奔馳於五欲之中。則諸三昧自然現前。汝等佛子。當知五根隨五欲流轉。則損法身。戕慧命。諸有智者。當以譬喻而得解。譬如牧牛者。執杖監視於牛。不令犯人苗稼。牛喻五根。人喻修行人。執杖喻攝念。如念佛持戒修觀皆是苗稼。喻三昧方便。及正受功德。若能攝念念佛。制伏五根。則不犯自性三昧智慧之苗稼。若禪智之苗稼增長。則無饑饉凍餒之虞矣。喻根不隨塵轉。則慧命法身。禪悅法喜之食充滿。汝等佛子。若不守攝五根。任其縱橫放逸於五欲。非獨起欲而妨道業。將沉苦海。而無邊際涯畔。不可制也。故須防護於未萌之先。預守於將發之際。縱五根者。又以惡馬不以轡制。惡馬喻五根。轡制喻正念。



也。墜入坑陷。喻沉惡道。又牛馬喻。似同而別。犯苗稼。喻敗壞善根爲因。墜坑陷。喻沉淪惡道爲果。三劫賊。喻若縱五根。如被劫賊。然世間之賊盜。劫奪財物。苦止一世。五根之賊。劫奪功德法財。殃及累世。爲害至大。凡修行人。于此根賊。不可不謹慎當心。而防範之。是故智者。當制五根。不隨塵轉。持防之如賊。不令縱逸。假令縱逸放蕩。迷染五欲。念念貪著。其苦惱何可勝言。然諸行無常。是生滅法。雖有如是可愛之五欲。而終歸無常敗壞。故曰。皆亦不久見其磨滅。

## 二欲放逸苦對治

此五根者。心爲其主。是故汝等當好制心。心之可畏。甚於毒蛇惡獸。怨賊大火。越逸未足喻也。譬如有人。手執密器。動轉輕躁。但觀於密。不見深阬。譬如狂象無鉤。猿猴得樹。騰躍蹕躑。難可禁制。當急挫之。無令放逸。縱此心者。喪人善事。制之一處。無事不辦。是故比丘。當勤精進。折伏汝心。

此段文對治三種障法。顯知此心有二種三昧相。眼耳鼻舌身之五根。奔逸於色聲香味觸之五欲。以心爲其主。根塵皆是鈍根無知之物。依心而轉。所謂心生則種種法生。心滅則種種法滅。三界唯心。萬法唯識。心不在焉。視而不見。聽而不聞。龐居士云。鐵牛不怕獅子吼。猶如木人看花鳥。但是無心於萬物。何妨萬物常圍繞。此皆顯五根者心爲其主之謂也。起信論云。一切境界。皆依妄念而有差別。若離妄念。則無一切境界之相。此可徵其根塵萬物。皆以妄念心而有也。但吾現前一念介爾之心。本非肉團。亦非緣影。豈無初後。橫絕邊涯。而衆生迷昧。一迷爲心。決定惑爲色身之內。昏擾擾相。以爲心性。當知善用其心者。卽昏擾擾處。原有性淨明體。生滅處卽是不生滅。卽妄安全真。波原是水。若離妄而求真。何殊離波而覓水。所謂斷除妄想。重增病趣。向真如亦是邪。此安心緣影。本是虛妄想相。原是體上之幻妄。識得妄無自性。卽可達妄卽真。是故汝等佛子。當好降伏。

其心當善調御其心。此妄緣心之可畏可怕。甚於毒蛇。甚於惡獸。甚於怨賊。甚於猛火。貪毒妄心。吸噬善根。過於毒蛇。噴毒妄心。吞害善根。過於惡獸。癡毒妄心。損滅善根。過於冤賊。貪瞋癡並起之等分妄心。焚燒善根。過於大火。越逸蛇獸賊火。僅喪色身三毒等心。傷害法身。故云未足喻也。制心有二。(一)事制則謹守根門。如禮拜供養。勤持念佛。都攝六根。淨念相繼。不令奔逸。(二)理制則體達根境本寂。動靜不二。如理持念佛。能所一如。湛然常住。上言心之可畏。以蛇獸等喻三毒心。此是心性差別障。能障無二念三昧。次譬如有人下。明輕動不調障。手中執持密器。浮動輕躁。但只觀於密器。揚揚自得。舉動不慎。則將墮入深坑。有喪身失命之虞。密器喻五根。受五塵樂。動轉輕躁。喻轉識隨逐諸根。念念不定。但觀於密。喻六識。唯緣現前六塵。不見深坑。喻不知未來障礙。根欲互粘。則將牽法身入於犁泥之深坑矣。世尊大悲心切。如此指示根塵之利害。猶恐汝等聞之。

如風過耳。故再以喻譬之。若不好制其心。譬如無鈎狂象。則奔蹕狂躑。如得樹猿猴。則騰逸跳躍。難可禁制。狂象無鈎。喻心無三昧。法所制。妄起三毒。造諸惡業。猿猴得樹。喻心緣六塵境。生染起五欲也。心猿意馬。此皆顯輕動不調障。能障調柔不動三昧。諸佛子等。當急伏其心。而折挫之。無令放逸。縱此心者。則喪滅世出世間善事。明失諸功德障。能障起諸功德三昧。是故比丘當勤精進。善巧折伏塵勞煩惱心。而顯露妙心。成等正覺。制心一處。則無事不辦。制之一處者。卽不起思量分別。不起亂想。一心湛然。此句卽示無二念三昧。無事不辦。能心制一處。專一不雜。無論辦何事。皆可得成。此句示起多功德三昧。精進折伏汝心。汝暫舉心。塵勞先起。欲降伏其心。非精進不爲功。能折伏而不散動。卽示調柔不動三昧相。

### 二多食苦對治

汝等比丘。受諸飲食。當如服藥。於好於惡。勿生增減。趣得支身。以除飢渴。如

蜂採華。但取其味。不損色香。比丘亦爾。受人供養。趣自除惱。無得多求。壞其善心。譬如智者。籌量牛力所堪多少。不令過分。以竭其力。

汝等比丘。四衆弟子等。受諸飲食。資活色身。勿起貪心。當受食時。須具五觀。而後受食。五觀者。一計功多少。量彼來處。二自忖己德。有無受供之德。三防心好惡。貪嗔等過。四正如良藥。爲療形枯。五爲成道業。而受食。初受諸飲食。當如服藥。卽自受對治觀。於好飲食。勿生貪心。而增食。於惡飲食。勿生憎心。而減食。是卽好惡平等觀。趣得供養。支持色身。以除飢渴。如藥以療病。食以療飢而已。是卽究竟對治觀。如蜂採花。但取其花之精味。不損花之色香。喻比丘受人供養。借此修道。除煩惱。而了生死。勿起貪心。而損失善心。是卽不損自他觀。蜂喻修行人。花喻供養。取味。喻除飢渴之惱。以辦道。不損色香。喻不損自他善心。貪食多求。既損自三昧。亦損檀越善心也。譬如有智之人。當籌量牛力。牛固能負重。而所負過重。

也。則竭其力。有損其牛。喻修行人。雖爲人世福田。而貪受多供。則其道自敗也。

### 三懈怠睡眠苦對治

汝等比丘。晝則勤心修習善法。無令失時。初夜後夜。亦無有廢。中夜誦經。以自消息。無以睡眠因緣。令一生空過。無所得也。當念無常之火。燒諸世間。早求自度。勿睡眠也。

此科文對治懈怠睡眠苦心。懶惰故懈怠。身悶重故睡眠。此二共成一苦。障於定慧不生。汝等佛子。爲了生死成佛道。二六時中。當勤精進。勿得貪懈怠。喜睡眠。空過光陰。晝則當使身心精進。修習禪智諸善功德之法。無令懈怠。蹉跎良好時光。夜則當使內外精進。修習定慧諸善功德。勿令睡眠虛度。可珍貴之命光。初中後夜。亦勿爲睡眠所困。縱在休息。亦當勿忘正念。夙興夜寐。讀誦大乘經典。如佛耳提面命。藉指見月。從文入觀。研討

個人消息。本來面目。無以睡眠因緣。令一生空過。無所得也。佛呵阿那律陀云。咄咄何爲睡。螺螄蚌蛤類。一睡一千年。不聞佛名字。尊者聞之。精進七晝夜。雙目失明。佛哀之。教修樂見照明金剛三昧。隨得天眼。當念無常之火迅速。慎勿放逸。如救頭然。人從初至終。一期生死。爲粗相無常。心心不住。念念生滅。爲細相無常。心本無生。因境有心。境本非有。因心生現。剎那剎那。不得停住。無常之火。不但正報衆生世間。有生住異滅之無常。卽依報器世間。亦有成住壞空之無常。無常之火。燒諸依正二世間。三界二十五有。有情與無情。同歸磨滅。人生浮脆。朝不保夕。石火電光。可畏可怕。有智之人。當早求自度。勿睡眠也。然而無常生滅之中。有湛然不動之常住。不生滅性。所謂亘古今而不變。歷萬劫而常新。有物先天地。不逐四時凋。之眞常性在。宜深窮深究。息心而達本也。勿貪睡眠。早度自性之衆生。念自性之彌陀。求出三界免輪迴苦也。

諸煩惱賊常伺殺人。甚於怨家。安可睡眠。不自警寤。煩惱毒蛇。睡在汝心。譬如黑蛇在汝室。睡當以持戒之鈎。早摒除之。睡蛇既出。乃可安眠。不出而眠。是無慚人也。慚恥之服。於諸莊嚴。最爲第一。慚如鐵鈎。能制人非法。是故比丘。常當慚恥。無得暫替。若離慚恥。則失諸功德。有愧之人。則有善法。若無愧者。與諸禽獸無相異也。

諸者不一之辭。煩惱者昏煩之法。惱亂心神也。諸煩惱卽見思塵沙無明也。自性本身清淨。卽被此煩惱昏迷煩悶之法。惱亂清淨心神。令心染濁。成虛妄垢心。見煩惱八十八使。思煩惱八十一品。塵沙煩惱。喻之甚多。若沙如塵。見思及界內塵沙。是枝末煩惱也。無明亦有四十二品。分齊頭數。多多無量。此無明與界外塵沙。是根本煩惱也。六凡被見思煩惱伺候。殺應化身人而有分斷生死也。二乘被塵沙煩惱伺候。殺尊特身人而有方便變易生死也。菩薩被無明煩惱伺候。殺法性身人而有實報變易生死。



也。汝等比丘。當知諸煩惱賊。甚於怨家相遇。睡眠亦然。安可不自警自策。而早自醒寤。精進勇猛。當知煩惱之毒。甚于毒蛇。此毒睡在汝心。譬如黑虻在汝室中。謂煩惱雖不現行時。亦未嘗不眠伏在藏之中。此煩惱毒害可畏。猶如黑虻不起則已。起必殺人。法身慧命。汝等當以何法而折伏之。當以持戒之鈎。可併除之。戒鈎者有三。持真諦戒鈎。見思黑虻。持俗諦戒鈎。塵沙黑虻。持中諦戒鈎。無明黑虻。睡蛇既出。乃可安眠。謂五住煩惱斷盡。二種生死已脫。所作已辦。不受後有。安然于常寂光中。乃可名爲安眠。是故阿羅漢斷心眠已。不斷食起時。節起眠。以彼眠不爲蓋覆。故然但斷見思煩惱毒蛇。尙非究竟耳。若不出而眠。是無慚人。謂煩惱未斷。三界未出。輒自安眠。是名無慚。無愧。不尊重己靈。名爲無慚。不羞己過惡。名爲無愧。不希爲聖。爲賢。名爲無慚。不恥卑賤。爲諸下劣。名爲無愧。慚恥之服。於諸福慧莊嚴中。最爲第一。慚如鐵鈎。能制人非法。是故汝等佛子。常常發

慚愧羞恥之心。無得暫替暫廢。若離愧恥。則失諸功德。有愧之人。則自能產生定慧諸福智。若無愧者。與諸禽獸無相異也。所謂人爲萬物之靈。與諸禽獸相異者。幾希。人之所異於禽獸者。廉恥而已。

三對治滅煩惱法要三。(初)瞋恚煩惱障對治。(二)貢高煩惱障對治。(三)諂曲煩惱障對治。今初瞋恚煩惱障對治。

汝等比丘。若有人來節節支解。當自攝心。無令瞋恨。亦當護口。勿出惡言。若縱恚心。則自妨道。失功德利。忍之爲德。持戒苦行所不能及。能行忍者。乃可名爲有力大人。若其不能歡喜忍受惡罵之毒。如飲甘露者。不名入道智慧人也。所以者何。瞋恚之害。則破諸善法。壞好名聞。今世後世。人不喜見。當知瞋心甚於猛火。常當防護。無令得入。劫功德賊。無過瞋恚。白衣受欲。非行道。人無法自治。瞋猶可恕。出家行道。無欲之人。而懷瞋恚。甚不可也。譬清冷雲中。霹靂起火。非所應也。

汝等佛子。當行忍辱波羅密。忍有二。(一)生忍。(二)法忍。不爲利衰毀譽等八風所吹動。名爲生忍。不被寒熱飢渴病痛之所摧轉。名爲法忍。若有人來節節支解身體時。晏然受忍。此爲所忍之境。當自攝心等四句。正示堪忍之相。不起嗔恨。是身意忍。亦當護口。不出惡言。是口忍。三業清淨。逆來順受。安忍不動。則諸喜功德。皆由此而生。節節支解。爲最重之逆境。堪能忍受。况其餘較輕之逆境。更可忍矣。是謂以重况輕。若縱恚心等三句。明不忍之失。自妨道業。失諸自利。失功德利。不能利他。恚心一起。二利俱喪。所謂一念瞋心起。百萬障門開。嗔火焰焰。燒盡菩提之種。忍之爲德。等者深嘆。勝力以勸。修行持戒之苦。尙不能及。忍之德力。忍之與戒較量。戒所不及。何以故。持戒者未必能忍辱。忍辱者決無不持戒。所以六度之中。戒居第二。忍居第三。以前不兼。後必具前故也。以我心而持戒。則報僅在人天。以無我心而行忍。便能成出世大道。故能行忍者。乃可名爲有力。

大人犯而不校。譬海闊天空。一任鳶飛魚躍者矣。小人以血氣爲力。君子以德爲力。小人取勝爲力。君子以退讓爲力。大肚含容。無所不包。故名力有大人。如金剛經云。我於五百世中。作忍辱仙人。被歌利王割截身體。節節支解時。不生嗔心。如是乃可名爲有力大丈夫也。坦腹容天下。無處而不自得。乃至無毀無譽。無得無失。橫逆惡境。卒然臨之而不驚不怖。所謂順逆皆方便。聖性無不通。便是出世奇男子。堪紹如來位矣。臨逆順境。風不能歡喜。忍受。如飲甘露者。不名入道人。乃名愚癡人也。若能忍辱受人惡罵。一切逆難之境界。現於目前。能不動不搖。如飲甘露入口。正是成增上緣。真是我善知識。所謂不應訕謗起怨親。何表吾人無生之慈忍力。當知若無彼之惡罵。不能成我之忍力。如豬揩金山。金則愈光。如石磨劍。則劍愈利。如歌利調達。皆是釋迦之真知識。不於惡罵作甘露想。不能歡喜。忍受。便是愚癡。不名入道智慧人也。所以者何。徵起詞。瞋恚之害。破清善法。

則失自利。壞好名聞。則失利他。今世無二利之因。後世無二利之果。瞋恚滿面。人人皆不喜見。都爲昔瞋而感。今報當知。瞋心甚於猛火之毒。燒盡功德之林。常當防護之。無令觸犯。假使瞋賊得入。則劫功德法財。貧窮孤露。顛倒受苦。是知欲護自利善法。當防瞋火。欲護他功德。當防瞋賊也。白衣受欲。結習然也。蓋白衣者。從人至六欲天。皆白衣人。非行道。人無法自制。尙可原諒。彼有二道。一者受欲。欲與瞋爲表裏。二不行道。無善法以自制。故瞋猶可恕。所謂俗人造罪。是其分內。不足責也。然白衣君子。亦何嘗不重忍辱。如張公百忍。九世同居。然出家行道。已示出塵離垢之相。表顯清淨無欲之形。而再懷瞋恚動怒。甚不可也。譬如清天朗日。靄鬱青雲中。卒然而起雷霆閃電。決非所應。如俗人行欲無善。滿腹煩惱。烏烟瘴氣。黑雲彌漫中。而起雷電霹靂。世所共許也。

## 二貢高煩惱障對治

汝等比丘。當自摩頭。已捨飾好。著壞色衣。執持應器。以乞自活。自見如是。若起憍慢。當疾滅之。增長憍慢。尚非世俗白衣所宜。何況出家入道之人。爲解脫故。自降其身而行乞耶。

此段對治貢高憍慢之障。諸佛子等。日當自摩其頭。已剃除鬚髮。示遠離相。故捨去飾好。著壞色衣。離五色華服。與道相應。披袈裟。著衲衣。皆用青黑木蘭等壞色。執持應器者。卽持食器。謂鉢多羅是也。既持鉢乞食。足知無僮僕以供役。鉢有體色量三。其體有鐵瓦二種。其色薰如鳩鷄。其量乃隨腹大小而置。三皆相應。故名應器。汝等佛子。著壞衣。行乞食。此是破高慢法。自是如是。當不應起憍慢。自舉曰憍。陵他曰慢。憍慢之高。譬如山也。是障道因緣。慢有七種。(一)慢於劣而謂己勝者。(二)過慢於等而爲己勝。於勝而謂己等者。(三)慢過慢於他勝中而謂己更勝者。(四)我慢執有我有我所有而使心高舉者。(五)增上慢。未證謂證。未得謂得者。(六)

卑劣慢於他多分勝中。自知卑劣而不甘底人而慢。(七)邪慢。成就惡行。高舉者。汝等佛子。惹起憍慢。當疾滅之。增長憍慢。尙非世俗白衣人所宜行。何況出家入道之人。入道者。爲解除二死。脫離五住。故謙自卑。自降其身分。而行乞食。誠爲衆生之良福田也。

### 三諂曲煩惱障對治

汝等比丘。諂曲之心。與道相違。是故宜應質直其心。當知諂曲。但爲欺誑。入道之人。則無是處。是故汝等。宜當端心。以質直爲本。

爲佛弟子。是法王子。勿得自輕自賤。用諂曲心。喪失清高品格。諂曲者。逢迎希合之言名諂。隨境透迤之念名曲。諂則不質。曲則不直。法華經云。我慢自矜高。諂曲心不實。與道相違背。是故宜應質直其心。楞嚴經云。佛告阿難。汝等欲研無上菩提。徵發明心。當以直心酬我所問。心念直故。如是乃至中間。永無諸委曲相。維摩經云。直心是道場。起信論云。直心正念真。

如直心正念真如者。卽如如智。照如如理。智理不二。心境一如。一如無二。如安可容秋毫諂曲。當知諂曲者。但爲自欺。及欺誑他人。欲期入道。斷無是處。是故汝等。當知菩提妙法樹。皆生直心地。宜當端正其心。以質直爲本。所謂因地不真。果招紆曲。以上明共世間法要竟。

二明不共世間法要。謂成就出世間大人功德也。文分爲八。(初)無求功德。(二)知足功德。(三)遠離功德。(四)不疲倦功德。(五)不忘念功德。(六)禪定功德。(七)智慧功德。(八)畢竟功德。今初。

汝等比丘。當知多欲之人。多求利故。苦惱亦多。少欲之人。無求無欲。則無此患。直爾少欲。尙宜修習。何況少欲能生諸功德。少欲之人。則無諂曲以求人意。亦復不爲諸根所牽。行少欲者。心則坦然。無所憂畏。觸事有餘。常無不足。有少欲者。則有涅槃。是名少欲。

多欲。煩惱障也。多求利業障也。苦惱亦多。報障也。當知之知字。卽始覺之。



智。衆生無始覺智。所以貪五欲。多求名利。其所感之苦惱果報亦多。由惑造業。因業招苦。相續不斷。三苦八苦。無量諸苦。所以六凡起着有之欲望。謂之多欲。求五欲而造有漏業。謂之多求。故感同居士生死之苦道。謂之苦惱亦多。二乘聲聞緣覺。起著空之欲望。謂之多欲。求偏空而造無漏業。謂之多求。故感方便士生死之苦道。謂之苦惱亦多。權乘菩薩。貪滯二邊。以爲欲望。謂之多欲。求神通化度而造二邊業。謂之多求。故感實報土之生死苦道。謂之苦惱亦多。無九界之多欲。多求。則無二死五住。多苦多惱之大患。是唯大覺法王尙矣。直爾少欲。尙宜修習。直者。但也。但能減少其欲。已得清淨之妙。尙須修習。何況少欲。能出生諸禪智功德。更宜修習。少欲之人。淡泊身心。所謂無求於人品自高。虛榮體面。本是水月空華。少欲之人。無別希望。湛湛寂寂。了了見無一物。故無諂佞灣曲之心。是無煩惱之惑障。無求人意。是無業道之業障。亦復不爲諸根所牽。是無苦道之報。

障。言不爲諸根所牽者。蓋眼根牽人受色。乃至身根牽人受觸。令人不得自在。卽是苦道。行少欲者。心則坦然。離諂誑也。則法身德顯矣。無所憂畏。不他求也。則般若德發矣。觸事有餘。知足故也。則解脫德成矣。三德具足。名大涅槃。法身成就。卽性淨涅槃。般若德成就。卽圓淨涅槃。解脫成就。卽方便淨涅槃。三卽一。一卽三。是爲摩訶般涅槃。那有少欲者。則有涅槃。少欲爲涅槃之因。涅槃爲少欲之果也。

## 二知足功德

汝等比丘。若欲脫諸苦惱。當觀知足。知足之法。卽是富樂安隱之處。知足之人。雖臥地上。猶爲安樂。不知足者。雖處天堂。亦不稱意。不知足者。雖富而貧。知足之人。雖貧而富。不知足者。常爲五欲所牽。爲知足者之所憐愍。是名知足。

汝等諸佛子。若欲解脫諸痛苦煩惱者。當觀知足。知足之法。卽是富樂安

隱之處。上段無求功德。是遠離他境界事。此段知足功德。是於自事中遠離也。知足者。不事妄求。安分守命。得過且過之謂也。知足之人。雖臥地上。猶爲安樂。如得臥平地。且勝牢獄。故稱猶爲安樂。不知足者。雖處天堂。亦不稱意。既處金屋。更羨瑤台。不知足者。雖居富貴。而若貧賤。知足之人。雖貧賤而卽富貴。昔有儒士。行知足法。菜食以當肉。安步以當車。無罪以當貴。清淨正真以自娛。故曰。知足之法。卽是富樂安隱之處。若有不知足者。常被五欲之所牽動。既失自利。又失利他功德。爲知足者之所憐愍。嘆惜。卽具利他功德。自不被五欲所迷。卽有自利功德。故知足者自他兼利。悲智雙運。智故自己不被塵欲所牽。安樂自在。悲故能憐他人之貪欲。憫其不知足也。

### 三 遠離功德

汝等比丘。欲求寂靜無爲安樂。當離憤鬧。獨處閒居。靜處之人。帝釋諸天所

共敬重。是故當捨己衆他衆。空閒獨處。思滅苦本。若樂衆者。則受衆惱。譬如大樹衆鳥集之。則有枯折之患。世間縛著。沒於衆苦。譬如老象溺泥。不能自出。是名遠離。

文有三門攝義。一自性遠離門。寂靜。卽法無我空。無爲。卽無相空。安樂。卽無取捨願空。此爲對治有我相之執着障。當離憤鬧對治有所之執着障。有爲。是生滅流動。昏擾不安之法。無爲。是寂滅靜明。安隱眞常之法。初心欲求寂滅安靜。當安心於寂寞冲虛中。離於喧憤熱鬧。繁華擾攘之處。當獨處山岩石窟幽閒清淨之所。獨宿孤峯。安閒自在。不與塵俗而浮沉。超然洒脫。安樂寂靜。凡喜淨樂寂之人。爲帝釋諸天所恭敬尊重。所謂樂獨善寂。制心一處。是真阿蘭若。若住茅廬石室。而身心不能寂靜。妄念紛飛。雖離憤鬧。而仍同雜居塵市。所謂山林之城市也。如須菩提尊者。於石窟中寂靜。雖聞佛由忉利天降。而尊者安然如常。一念不生。帝釋散花。尊

者問誰。答謂尊者善說般若。尊者曰。我無說法。帝釋曰。我亦無聞。當知無說無聞。正是真說真聞也。諸佛子等。欲寂靜安居。成就三昧者。當捨己衆。他衆。空閒獨處。思滅苦本。己衆他衆者。有事有理事之己衆。如自己之眷屬。徒衆同學等。事之他衆。如他人之眷屬。徒衆同學等。理之己衆。如五蘊熾盛。理之他衆。如自心心所法。十一個善心所。二十六個惡心所等。爲自衆。他衆當捨者。卽放棄一切。捨離事理二衆。制心一處。成就道業。若不捨事理己他二衆。則牽纏綢繆。憤鬧煩惱。與道相違。欲到清涼地。無有是處。如圓教五品觀行人。有道有德。己衆他衆。徒衆弟子親近。如雲籠月。而善知識爲脚跟。未究竟故。法源未徹底故。尙須縮德露癡。示現逆行。或一舉萬里遠遊他方。而屏捨自他二乘。何況初心佛子。雖已示超塵離垢之相。而斷不能與世俗情見。同一鼻孔出氣。自應離諸塵勞。安心寂靜。以辦道業。若論自心之己衆他衆。皆由無始妄動。一念不覺。生三細境界。爲緣長。

六粗。卽此一念妄動。卽爲自心己衆他衆之本。爲無量衆苦之源。當知本無身心世界。安有生滅成壞。皆由自心之己他二衆。不捨捨故。果能內攝六根。外捨六塵。中捨六識。一念不生。卽如如佛。所謂不與萬法爲伴侶。畢竟空無所有。不落二三。豈有己衆他衆。是爲正觀。思惟前念卽滅。後念不生。正恁麼時。孤楞楞一念。坐斷兩頭。中間不立。惟如如智。契如如理。一如無二如。卽無分別智。照無分別境。一心湛然。豎窮橫遍。是謂空閒獨處。無住而住。如法而住。則照見五蘊。一念本空。卽滅衆苦之本。遠離虛妄所起之妄因。卽度一切苦厄。此是修習遠離門。方便出故。若著己他衆者。則受衆惱。隨生死流。譬如大樹。衆鳥集聚。則樹有枯槁折斷之患。大樹喻第六識。衆鳥喻諸心所法。此約己衆言之。大樹喻修行入衆鳥喻同學弟子等。此約他衆言之。從此己他之衆。諸見集生。喻招枯折之患。此是受用諸見門。被世間之五欲縛着。沒於衆苦之海。一味貪着財色眠食睡。自纏自縛。

如春蠶之作繭。如秋蛾之赴燈。則沉沒苦海。無有了期。法華經云。諸苦所因。貪欲爲本。譬如老象溺泥。不能自出。喻行者無觀照之智。遂妄奔逸。則將溺五濁之淤泥。若能回光返照。一心念佛。七日不亂。則仗彌陀願力。接引離此淤泥。出三界。超五濁。破五陰。而復本心源。回入娑婆。巧把塵勞。爲佛事。則免老象淤泥。老喻觀智衰微。卽是惑障。象身重大。喻縛着情厚。卽業障。溺泥。喻沒於衆苦。卽是報障。一不遠離。三障恆縛。可不懼哉。

#### 四不疲倦功德

汝等比丘。若勤精進。則事無難者。是故汝等。當勤精進。譬如小水長流。則能穿石。若行者之心。數數懈廢。譬如鑽火未熱而息。雖欲得火。火難可得。是名精進。

精進爲六波羅密之一。對治懈怠疲倦過。汝等佛子。若勤精進。則了生死成佛道大事。不難成就。勤則不墮。精則不雜。進則不退。三業精進。十善增

長一門深入。入一無妄。於了生死之難事。如返諸掌。功用精進。如一人與萬人敵。自應全副精神專注。不能絲毫疎忽。若唯精唯勤。不懈不退。則事雖難而易成也。所謂制心一處。無事不辦。天下無難事。只怕有心人。卽言恆常精進心也。若朝三暮四。則事雖易而難成也。如一暴十寒。未有能生者也是故。汝等佛子。當勤精進。譬如小水長流。則能穿石。繩鋸木斷。水滴石穿。卽無間精進功德也。若行者之心。數數懈廢。常常間斷。則不能圓成道業。譬如鑽木取火。未熱而息。云何得火。卽熱而息。尙難可得。况未熱而息。更難得火。故云。雖欲得火。終難可得。火卽喻三昧智火。三昧智火。非精進鑽研。則不能出。出之則燒。盡諸煩惱木矣。昔大施太子。爲衆生故。取海中如意珠。發精進心。不休不息。終滿所願。不如昔之蘇秦刺股之精進。終取相印。管寧割席之精進。後成大學。世間法。尙須精勤而後得成。况出世佛法。安得不精進勇猛。抱專一不雜之心。百折不回之志。無畏精神。心體



力行而冀其圓成也。

### 五不念功德

汝等比丘。求善知識。求善護助。無如不念。若有不念者。諸煩惱賊。則不能入。是故汝等。常當攝念在心。若失念者。則失諸功德。若念力堅強。雖入五欲賊中。不爲所害。譬如著鎧入陣。則無所畏。是名不念。

不念者。卽不念失正念也。凡修何法門。必須正念昭彰。靈靈不昧。了了分明。自不被現前塵欲所昧。而超然獨表。於何法修。皆得成就。求善知識者。所謂欲行山下路。須問過來人。善知識有三。一教授善知識。教導修持方法。指授用功徑路。二同行善知識。同舟共濟。互相警策。三外護善知識。專任外護。如虎啣兒。茲文中所言求善知識者。指教授聞法行也。聞名欽德曰知。覩形敬奉曰識。又曰善知衆生之病。善知法門之藥。能應病與藥。對機說法。是名善知識也。求善護善助者。護者內善思惟。如聞而思。善護

不失也。善助者。外善實行。如思而修。以所修之行。善助其所解也。若有不忘念者。不忘失正念也。聞行能不忘失正念。則有聞慧。思行能不忘正念。則有修慧。聞思修三行。亦各三慧。慧以照了爲義。行以進趣爲義。能照了而進趣。卽正念昭彰之故。所以爲諸佛之所護念。諸煩惱賊。見諸正念。便卽遠離。不能窺入。是故汝等。常當收攝正念在心。若失正念者。則煩惱賊。劫諸功德法財。若正念力量堅固牢強者。則強軟諸欲之賊。雖入不爲所害。如著鎧甲而入戰鬥場中。則無所畏懼。喻如行者披金剛正念三昧之鎧。乘大無畏精神。於生死陣。煩惱軍中。橫衝直入。一往無前。所向披靡。是名不忘念功德。

### 六禪定功德

汝等比丘。若攝心者。心則在定。心在定故。能知世間生滅法相。是故汝等。常當精勤修習諸定。若得定者。心則不散。譬如惜水之家。善治隄塘。行者亦爾。

爲智慧水故。善修禪定。令不漏失。是名爲定。

此段文名禪定波羅密。爲對治散亂。佛以大圓鏡智。照見衆生心中散亂心。念念生滅。昏擾擾相。以爲心性。汝等佛子。若欲收攝心者。則當制心在定。心在定故。能知世間生滅法相。如水澄影現。禪定有世間出世間之殊。世間禪定。四禪八定也。出世間禪。觀練熏修也。又出世上上禪。如九種大定。如云。那伽常在定。無有不定時。禪那。此云思惟修。正念思維。心定一境。又云寂靜修。一心湛然。寂寞冲虛。又云靜慮。靜卽止定。寂靜也。慮卽觀慧。思惟也。定慧平等。止觀均齊。名曰禪那。初入禪那。則諸根寂靜。憎愛不起。久之則微密觀照。豁然貫通。入薩婆若海。所以恆沙界外。一滴之雨。尙知頭數。何況四相生滅遷流之虛妄相。安得不知。所謂靜寂光通達。寂照含虛空。如杲日當空。照臨萬象。森羅觸境逢源。無不明了。如人在塵濁中。不見塵濁相。及上昇虛空。則大地萬物。無不在一眼之中。故知心在定故。能

知世出世間。生滅流動之相。是故汝等佛子。常當精進。修習諸定。言精進者。對治三種懈怠。一精進修習禪定。節量食臥。調出入息。對治不安隱懈怠。二精進修習禪定。覺知諸定。有通慧功德。能盡苦源。及能成就大希有事。對治無味懈怠。三精勤修習禪定。觀察生老病苦。及四惡趣苦。我未能離。對治不知恐怖懈怠。由精勤修習禪定。卽對治三種懈怠。便能發無漏慧。斷惑證真也。譬如惜水之家。善治隄塘。築土以防溢漏。行者善修禪定。亦爾。爲智慧水。能洗煩惱垢。故善攝其心。善修禪定。令不漏智慧水。則可免陷墮生死苦海中矣。有定無慧。爲邪定。有慧無定。是狂慧。能定慧圓融。可直達如來地。是名爲卽慧之定。

### 七智慧功德

汝等比丘。若有智慧。則無貪著。常自省察。不令有失。是則於我法中能得解脫。若不爾者。旣非道人。又非白衣。無所名也。實智慧者。則是度老病死海。堅

牢船也。亦是無明黑暗大明燈也。一切病者之良藥也。伐煩惱樹之利斧也。是故汝等當以聞思修慧而自增益。若人有智慧之照。雖是肉眼。而是明見人也是名智慧。

智慧功德對治愚癡昏昧。智慧是光明義。愚癡是昏暗義。以智慧光能照破昏昧。若能了知見聞若幻翳。三界等空花。凡所有相皆是虛妄。是皆有智慧。故了達一切虛妄之緣起。當然不起貪着之心。有真空一切智。則無貪着凡夫之幻有。妙有道種智。則無貪着二乘之偏空。中道一切種智。則無貪着菩薩之二邊。有智慧故。了知無所得。無所得故。無罣礙。無罣礙故。無有恐怖。貪着有二。(一)於真實義處生着。即迷理無明。名理障也。(二)於世間事處生着。即迷事無明。名事障也。若有智慧。則二着不起。名破事理二障也。由中道智慧。斷迷理無明。故六七二識。不貪着第八識之見分。以爲我法。是名遠離真實義處障。由真空智慧。斷迷事無明。故前六識不

於六塵境界而生貪着。是名遠離世間事處障也。常自省察。知事理二障之所纏。時時觀照。勿使障生。不令有失。是則於我佛法中。能得解脫自在。又事障不生。枝末無明破。我執斷矣。理障不生。根本無明破。法執斷矣。既不被我法二執纏縛。故解脫自在。若不爾者。既非智慧道人。又非白衣居士。不可命名。無所名也。夫真實之智慧。確是度生老病死之苦海。而爲登涅槃彼岸之堅固牢強之大航船也。自性本是大光明藏。無智慧故。將具體光明藏。受三惑黑暗包圍。何異處在無明窟裏。黑暗岩下。但能慧照現前。則羣昏灼破。所以千年暗室。一光能消。無始無明。一觀能破。是知智慧爲無明黑暗中。之大明燈也。一切病者。九界衆生。見思塵沙。無明三惑。輕重之病。惟三觀智慧之良藥。方可療救。故智慧爲一切病之良藥。三惑煩惱。喻如樹木叢林。惟以三觀智慧之利斧。能伐除之。故云智慧爲伐煩惱樹之利斧也。又知苦諦智。如堅牢船。斷集諦智。如大明燈。證滅諦智。猶如

良藥。修道諦智。猶若利斧。亦可以四喻。喻聞思修證也。聞慧如船。思慧如燈。修慧如藥。證慧如斧。是故汝等。當以聞思修而自增益。楞嚴經云。從聞思修。入三摩地。名字位中。聞慧增益。得入停心別總相念。觀行位中。思慧增益。得入煖頂忍世第一相似位中。修慧增益。得見四聖諦理。發無漏慧。以證道果。因中三慧未具。天眼慧解脫人。亦無天眼。然皆四諦分明。不墮邪見。故云。雖是肉眼。則是明見人矣。此約藏教義解。餘教例知。

### 八畢竟功德

汝等比丘。若種種戲論。其心則亂。雖復出家。猶未得脫。是故比丘。當急捨離亂心戲論。若汝欲得寂滅樂者。唯當善滅戲論之患。是名不戲論。

上來七種功德。皆是長養方便功德。惟此示自性遠離。名畢竟功德也。戲論者。是嬉戲荒謬之妄言。虛妄亂說之臆談也。身則輕浮妄動。掉舉遊走。凡無益之奔馳亂走者。皆戲論之行也。口則亂說妄言。誑談是非。凡無益

所說者皆戲論之語也。意則妄想紛飛。散亂雜念。凡無益之念者。皆戲論之心也。此三業之戲論。出生無量煩惱。然種種戲論。不出理事二種。六凡於世間事。起執有之戲論。三乘於出世間理。起偏空但中之戲論。惟大覺世尊。理事無礙。真俗圓融。唯是一真實相。無有戲論。除第一義諦。餘皆魔事。咸歸戲論。當知卽心自性。惟是涅槃妙心。離四句。絕百非。言語道斷。心行處滅。唯是如如。安有戲論。但六凡着有。凡所言說。皆是戲論。再言之。則藏教真居事外。仍是戲論。以其棄有着空。空在有外。生滅而滅。生正是戲論。若卽事恆真。乃非戲論。又卽空不具諸法。仍是戲論。中道不空。乃非戲論。又離邊立中。仍是戲論。卽邊卽中。乃非戲論。又對權明實。仍帶戲論。開權顯實。無麤非妙。乃非戲論。又說權說實。說本說迹。亦皆戲論。觀心若起。本迹俱絕。乃非戲論。又唯貴默然。而墮絕言見。仍屬戲論。知四句。皆不可說。有因緣故。亦可得說。說與不說。性自平等。不作二解。不作一解。不作亦



一亦二及非一非二解。乃非戲論也。是故比丘。當急捨離亂心戲論。欲得無上涅槃寂滅樂者。唯當善滅戲論之患。生滅既滅。寂滅現前。是名不戲論。至此正宗分竟。

三流通分爲四。初勸修流通。二證決流通。三斷疑流通。四囑付流通。今初。

汝等比丘。於諸功德。常當一心。捨諸放逸。如離怨賊。大悲世尊。所說利益。皆已究竟。汝等但當勤而行之。若於山間。若空澤中。若在樹下。閒處靜室。念所受法。勿令妄失。常當自勉精進修之。無爲空死。後致有悔。我如良醫。知病說藥。服與不服。非醫咎也。又如善導。導人善道。聞之不行。非導過也。

上釋正宗分竟。此下爲流通分。如人之手足。能執捉運奔。流通無滯。此經是我佛最後之垂範。能依教修持。卽是流通此經。於諸功德。卽指正宗分中二大科。一。共世間法要。對治三障。二。不共世間法要。明八種大人功德。

當知此經文雖略而義富。明世出世間法要。該括五時八教。三藏十二部。能依斯經修持。卽遵佛一代所說之遺教。常當一心。捨諸放逸。一心者。卽無思量分別之心也。所謂識得一。萬事畢。一心湛然。捨離前塵五欲之放逸。不事馳求。根既不緣。塵無所偶。如離怨賊。如離火聚。怨賊不離。則將戕身損命。然須知怨賊相遇。苦僅一世。受害尙有限。煩惱賊聚。則戕法身。害慧命。受無量劫苦。無有了期。大悲世尊。所說利益。皆已究竟。佛是三德圓萬德備。佛見衆生。是心內衆生。見衆生有病。卽是我病。所以起無緣大慈。運同體大悲。悲能救苦。慈能與樂。佛之大悲。是無遮大悲。稱性吐露。咸令衆生。皆以如來滅度而滅度之。不但令其現在法會之大衆。而得度脫。卽未來之未來衆生。皆當依此遺教奉行。亦得度脫之。是卽所謂無遮大悲。世尊者。世出世間。唯佛獨尊。佛爲三界導師。四生慈父。故稱大悲世尊。世尊始於鹿苑。終在雙樹。於其中間。所說五時八教。三藏十二部。乃至此最

後遺教。所說利益。皆已究竟。教理智斷。行位因果。徹底發明。無不究竟。無不吐露殆盡。汝等佛子。但當勤而行之。翹勤五體。各自努力。前程大事。可也。若聞而不行。何殊畫餅。無益於飢腸。在佛海邊。而被渴死。殊甚可惜。如聞而不思。則罔思而不修。則殆。然世出世間法要。已究竟告於汝等。唯願爾等。如聞思而起真修。可也。當在何處修習。或於山谷石窟中。或於空閒大澤間。或在深林樹下。或在閑寂之處。或在幽清靜室。如是五處。皆可修道。若身在寂靜。而心不能寂靜。則自欺者甚矣。如蒸沙成飯。縱經塵劫。終是無益之戲論。若靜若動。若閒若鬧。若始若終。身心俱寂。是真修行。是真阿蘭若處。汝等當正思念。現我臨了。所說法要。雖言辭無多。但了生死。成佛道。綽然有餘。切勿忘失。勿辜負我最後囑付。切勿自暴自棄。常常自勉。自勵。時不待人。勿得空過。但念無常。慎勿放逸。如不辦已躬大事。終日塵勞俗累。爲他人忙。背覺合塵。認賊作子。糊塗而生。糊塗而死。是謂無爲空。

死。無所名也。後致有悔。日暮途窮。悔之晚矣。汝等當知我佛是大醫王。善知衆生生死病。今付汝等治病之妙藥。服與不服。非醫咎也。我佛一代設化。說四十九年之法藥。設三百餘會之診所。施藥施診。我佛責任盡矣。又我佛如具善巧方便之大引導師。接引衆生。入康莊平坦之安善道路而行。愚癡聞而不行。反走入荆棘羊腸。此非導者過也。我佛接引衆生以最穩最易最方便最捷徑之道。以念佛法門而攝授之。但汝等聞而不行。或縱行而復朝三暮四。信願不堅。資糧不足。欲到安養。無有是處。所謂說食不能充飢。畫餅何能濟腸。爲生死心切者。當不捨此法門而真修實行之。

## 二證決流通

汝等若於苦等四諦有所疑者。可疾問之。毋得懷疑。不求決也。爾時世尊。如是三唱。人無問者。所以者何。衆無疑故。是阿菟樓駄。觀察衆心。而白佛言。世尊。月可令熱。日可令冷。佛說四諦。不可令異。佛說苦諦實苦。不可令樂。集真

是因。更無異因。苦若滅者。卽是因滅。因滅。故果滅。滅苦之道。實是真道。更無餘道。世尊。是諸比丘。於四諦中。決定無疑。

汝等佛子。於苦等四諦。常當觀察。依之起行。如來一代聖教法門。法相無邊。義理至多。但略而言之。四諦代表攝盡。無餘蘊矣。苦集二諦。攝盡世間因果。道滅二諦。攝盡出世間因果。苦則四相遷迫。集則感業牽報。滅則二脫離縛。道則三學能通。然四諦有四教。四諦之不同。所謂生滅。無生。無量。無作。四四諦。詳在四教儀集註。茲不贅述。汝等於此四諦。有所疑者。可以及早速疾來問。毋得懷疑不問。不求決疑。後悔莫及。爾時世尊。作如是三次唱言。是時大衆默然。世尊知之。衆無疑故。阿菟樓駄。卽阿那律陀。佛之堂弟。此翻無貧。過去世中。施辟支佛飯。得無窮報。天眼第一。今作分別說。以天眼觀察衆心。而稟白佛言。世尊。月可令熱。日可令冷。佛說四諦。不可令異。月是太陰精。故冷。日是太陽精。故熱。然此依報器世間法。皆是吾人。

唯識所現。卽是識之相分。本無實法。故有得神通者。便可令冷月成熟。月熱日爲冷日。但佛說四諦。不可令異。所謂亘古今而不變。歷萬劫而常存。佛所說四諦。乃是衆生心性。法爾道理。理無變異。佛說苦諦實苦。如苦諦者。三界二十五有。下自阿鼻地獄。上至非非想天。雖升沉迴異。然無不爲四相所遷。八苦所逼。安可令其樂。集真是因。更無異因。集諦者。見思二惑。善惡不動。有漏諸業。是牽衆生入生死界之因。的無異因。苦果若能滅者。卽知其集因必滅。由集因滅。故苦果滅也。苦因果滅。豈非寂靜無爲安樂。滅苦之道。實是真道。更無餘道。道諦之戒定慧三。能斷苦因苦果。至無苦處。安有餘道。此四皆審實不虛。故名爲諦。是諸比丘。於四諦中。決定無疑。佛如實而說。爲佛弟子。亦應如實而解而行。所以決定無復疑矣。

三斷疑流通。又三初顯示餘疑。二爲斷彼之疑。三重說有爲無常相勸修今初。

於此衆中。所作未辦者。見佛滅度。當有悲感。若有初入法者。聞佛所說。卽皆得度。譬如夜見電光。卽得見道。若所作已辦。已度苦海者。但作是念。世尊滅度。一何疾哉。

是時涅槃會上大衆心理。有三種差別。一所作未辦者。二初入法道者。三所作已辦者。所作未辦者。卽初二三果也。此三果殘思之煩惱猶在。尙有情愛。見佛入滅。離世長辭。不忍捨離。故有悲感。有初入法者。指觀行外凡。相似內凡之七賢位人。今聞佛所說。卽皆得度。從凡入聖。一聞佛法。速疾見道。譬如夜間電光。卽得見道。如夜見電光。更非延緩。以見道一十六心。不出一刹那故也。若所作已辦。已度苦海者。無學位人也。已斷見思。出三界苦。名曰已辦。其實所知障全在。故見佛速疾滅度。但作是言。世尊滅度。一何疾哉。是卽未破迷理無明。不知佛實常住。爲衆生故。非滅現滅耳。

## 二爲斷彼之疑

阿菟樓駄。雖說此語。衆中皆悉了達。四聖諦義。世尊欲令此諸大衆。皆得堅固。以大悲心。復爲衆說。汝等比丘。勿懷悲惱。若我住世一劫。會亦當滅。會而不離。終不可得。自利利他。法皆具足。若我久住。便無所益。應可度者。若天上人間。皆悉已度。其未度者。皆亦已作得度因緣。自今以後。我諸弟子。展轉行之。則是如來法身常在而不滅也。

阿那律。雖代衆已說此語。而在會大衆。悉皆了達。此四聖諦義。聖諦者。惟聖人方得了達。又證此四諦。方成聖果。故名聖諦。又理雖固然。唯聖諦了。故名聖諦也。知苦斷集。慕滅修道。乃至究竟四諦。四諦既了。則於如來一代時教。無不貫澈。衆生迷此四諦。列祖悟此四諦。諸佛證此四諦。菩薩修此四諦。世尊將垂涅槃。欲令大衆。皆得堅固。堅固者。卽亘古亘今。常住不變。歷劫常存。不遷不壞。此名之謂究竟堅固。所謂澈法底源。無動無壞。卽阿耨多羅三藐三菩提也。舉眼所觀。身心世界。依正二報。一一無非是生。



滅。非堅固也。大悲世尊。要令在會大衆。證入四聖諦義。以生滅中。而達不生滅義。以虛妄相。而證眞常理。以動壞法。令達不動壞性。故名皆得堅固。不但令在會大衆。得堅固已。卽未來之未來。最後無量劫之大衆。得依遺教修持。亦當皆得堅固。世尊以無遮大悲。流出無等等之甘露。汝等比丘。勿懷悲惱。乃至而不滅也。是段文中。有三義。(初)從勿懷悲惱。至更無所益。卽指上文。斷所作未辦。見佛入滅而生悲感之疑。旣自利利他。法皆具足。能依之修道。必得成辦。至於會必有離。生必有滅。自是世間法。應爾。且我久住於世。反令衆生生諸憍慢懈怠。更無所益。何用悲感爲哉。(二)從應可度者。至得度因緣。卽指上文。斷電光見道之疑。謂有疑曰。佛住世間。聞說卽皆得度。佛滅度後。見道無由。故今釋曰。所應度者。我已度訖。縱未度者。皆已爲作得度因緣。因緣若到。勿愁不見道也。所謂欲知佛性義。當觀時節因緣。時節若至。其理自彰。(三)自今以後。至而不滅也。卽指上文。

滅度何疾之疑。既弟子展轉行之。則因分住持不壞。既法身常在而不滅。則果分住持亦不壞。因果俱常。何云疾滅。然此對權機故。且說五分法身為常耳。若入實者。應化亦常。智者大師。誦法華至藥王品。入定親見靈山一會。儼然未散。所謂非滅而示滅。滅即非滅。佛實常住。並無灰斷。此理蓋權機未見耳。

三重說有爲無常相勸修

是故當知。世皆無常。會必有離。勿懷憂惱。世相如是。當勤精進。早求解脫。以智慧明。滅諸癡暗。世實危脆。無堅牢者。我今得滅。如除惡病。此是應捨之身。罪惡之物。假名爲身。沒在老病生死大海。何有智者。得除滅之。如殺怨賊。而不歡喜。

文有二意。從初至無堅牢者。正明無常觀門。以勸勤修。雖大乘學者。亦宜修無常觀。以助道。(一)從我今得滅以下。是引己作證也。汝等佛子。當知

世皆無常。會必有離。但汝等見我佛將去。悲感憂惱。當知有情及器世間。成必有壞。合必有散。皆是無常生滅之法。凡所有相。皆是虛妄。一切諸法。同歸磨滅。汝等佛子。當勤精進。努力修持。弘法利生。早求解脫。妄生妄死之苦。而得常住寂滅之樂。以智慧之光明。可滅諸昏暗之無明。世間法實是至危至脆。如水上漚。草上霜。忽生乍滅。無堅牢者。我佛今當中夜入滅。得寂靜樂。機緣既盡。將捨此衆惡之身。如除惡病。汝等當爲之喜。勿生悲惱。此幻妄之軀。是臭皮囊。爲應分捨棄之身。人之有苦。爲吾有身。是知此身。爲衆苦之本。諸惡之藪。本無此身。假四大而幻妄名身。諸有智者。自當捨棄厭離。如我滅度而滅度之。捨棄此身。如殺怨賊。如離火坑。如出囚獄。法喜充滿。無有恐怖。歸隱寂滅。當大歡喜。安有具智識者。見除惡病殺冤賊而不歡喜哉。此是斷疑流通竟。

#### 四囑付流通

汝等比丘。常當一心。勤求出道。一切世間。動不動法。皆是敗壞不安之相。汝等且止。勿得復語。時將欲過。我欲滅度。是我最後之所教誨。

汝等佛子。諦聽諦聽。生死事大。無常迅速。常常當制心一處。安住三昧。勤求出離九界之要道。證入無生之妙門。此是我佛之最後教誡。當知一切世間。動不動法。皆是敗壞不安之相。六凡善惡業是動法。禪定業是不動法。而皆是有漏。皆是動法。出世無漏。方是不動法。然二乘偏於空。被空所動。菩薩偏於二邊。但中被二邊。但中所動。仍是動法。六凡三聖。雖有動靜之殊。總屬敗壞不安之相。唯佛澈證衆生本具之如來藏性。不變隨緣。非動而動。隨緣不變。動而非動。佛之出世。欲令衆生咸證非動非不動之妙性也。汝等須知。時至中夜。勿失中道之時。我將入滅。勿得復語。現我所說。爲我最後之所教誨遺訓。凡是我嫡子者。當依教奉行。弘法爲家務。利生爲事業。嗚呼。我佛末後殷勤。悲心極矣。爲弟子者。宜如何翹勤而奉此遺

命耶。

佛遺教經講義終

佛遺教經講義

佛遺教經講義 功德主名錄

委印文號：108316

一三、〇〇〇元：往生者劉家菁。

以上計新台幣：一三、〇〇〇元，恭印一、〇〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；

若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持  
輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛曆二五六三年／西元二〇一九年七月

## 佛遺教經講義

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：www.budaedu.org

E-mail: budaedu@budaedu.org

電話：(011) 三三九五——一九八

劃撥戶名：財團法人佛陀教育基金會 郵局劃撥帳號：〇七六九九七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三（銀行代號：004）

本會經書免費結緣之請取方式如下：

(一) 親臨本會三樓講堂。(二) 利用傳真：02-23965959

(三) 撥打電話：(02) 23951198 分機：11 / 12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通

※捷運：善導寺站 5 號出口，至杭州南路右轉，過兩個紅綠燈。

※公車站牌：審計部站 ↓ 212、299、232、205、276、605、257、262

台北商業技術學院 ↓ 253、297、237 仁愛路二段 ↓ 253、297 開南商工 ↓ 208

仁愛路、杭州南路（紹興街）口 ↓ 630、270、263、245、621、651、37、261

行政院新聞局出版事業登記證局版臺業字第 三 八 六 九 號

恭印：一〇〇〇本

流水號：16920  
書號：CH356-04



